



Broj: 08-01-03/2-11-2-958-16/26

Dana: 06.05.2026. godine

Na osnovu člana 69. stav (3) i člana 70. stav (4) i (6) Zakona o javnim nabavkama ("Službeni glasnik BiH", broj: 39/14, 59/22 i 50/24), na Preporuku Komisije za javne nabavke roba, usluga i radova iz akta broj: 08-01-03/2-11-2-958-12/26 od 05.05.2026.godine, u postupku javne nabavke "Nabavka klima uređaja", ministar Ministarstva unutrašnjih poslova Zeničko-dobojskog kantona, donosi:

ODLUKU
o poništenju postupka javne nabavke

Član 1.

Poništava se postupak javne nabavke za "Nabavka klima uređaja", zbog povrede postupka prilikom otvaranja ponuda, a u skladu sa članom 69. stav (3) Zakona o javnim nabavkama.

Član 2.

Ova Odluka stupa na snagu danom donošenja i objavit će se na web stranici ugovornog organa, istovremeno sa njenim dostavljanjem svim učesnicima u postupku javne nabavke, u skladu sa članom 70. stav (6) Zakona o javnim nabavkama.

O b r a z l o ž e n j e

Na osnovu Odluke o pokretanju postupka javne nabavke broj: 08-01-03/2-11-2-958/26 od 09.04.2026. godine, Ministarstvo unutrašnjih poslova Zeničko-dobojskog kantona, kao ugovorni organ, pokrenulo je otvoreni postupak javne nabavke roba pod nazivom „Nabavka klima uređaja“. Obavještenje o nabavci broj: 488-1-1-19-3-29/26 objavljeno je na Portalu javnih nabavki dana 10.04.2026. godine, dok je sažetak obavještenja objavljen u „Službenom glasniku Bosne i Hercegovine“, broj: 27/26 od 17.04.2026. godine. Procijenjena vrijednost predmetne javne nabavke iznosila je 5.982,91 KM bez PDV-a. Za provođenje predmetnog postupka imenovana je Komisija za javnu nabavku Rješenjem broj: 08-01-03/2-11-2-958-2/26 od 10.04.2026. godine.

U ostavljenom roku za dostavljanje ponuda, odnosno do dana 04.05.2026. godine do 10:00 sati, Komisiji je predato ukupno osam (8) ponuda i to ponude ponuđača: „HM ONE“ d.o.o. Zavidovići, „HTC-HIDRO TERMO CENTAR“ d.o.o. Sarajevo, „PERO“ d.o.o. Zenica, „HIDRO-GEO INŽINJERING“ d.o.o. Tešanj, „INTER-COM“ d.o.o. Zenica, „A/C SERVIS S.P. GOLEMOVIĆ BOJAN“ Banja Luka, „M.A.R.“ d.o.o. Zenica i „MOON“ d.o.o. Zenica.

Dana 04.05.2026. godine sa početkom u 10:00 sati Komisija je izvršila javno otvaranje blagovremeno dostavljenih ponuda, te sačinila Zapisnik o zaprimanju ponuda broj: 08-01-03/2-11-2-958-11/26 i Zapisnik sa javnog otvaranja ponuda broj: 08-01-03/2-11-2-958-12/26, koji su dostavljeni navedenim ponuđačima elektronskim putem.

Međutim, u fazi pregleda i ocjene ponuda, dana 04.05.2026. godine u 13:00 sati, Komisija je od strane Odsjeka za poslove pisarnice i arhiva obavještena da je kod navedenog Odsjeka evidentirana i ponuda ponuđača „IMTEC“ d.o.o. Zenica za predmetni postupak javne nabavke, a koja nije predana Komisiji u 09:35h.

Komisija je istog dana, u 13:50 sati, preuzela navedenu ponudu i neposrednim uvidom utvrdila da je ista uredno zaprimljena u pisarnici ugovornog organa dana 30.04.2026. godine u 12:10 sati.

Dakle, predmetna ponuda je bila blagovremeno dostavljena, ali usljed internog administrativno-tehničkog propusta prilikom zaprimanja, evidentiranja i blagovremenog prosljeđivanja pristigle pošte, ista nije predana Komisiji prije zakazanog termina javnog otvaranja ponuda, niti je otvorena zajedno sa ostalim blagovremeno pristiglim ponudama.

Zbog navedenog propusta predmetna ponuda nije evidentirana u Zapisniku o zaprimanju ponuda, nije obuhvaćena Zapisnikom sa javnog otvaranja ponuda.

Navedene okolnosti predstavljaju bitnu povredu postupka javne nabavke, budući da je kompromitovan zakonom propisani postupak javnog otvaranja ponuda kao jedan od ključnih instrumenata osiguranja transparentnosti, javnosti rada Komisije i jednakog tretmana ponuđača.

Ugovorni organ posebno cijeni da predmetni propust nije moguće otkloniti naknadnim otvaranjem predmetne ponude, niti parcijalnim procesnim radnjama, iz razloga što bi takvo postupanje bilo suprotno načelu javnosti otvaranja svih blagovremeno pristiglih ponuda, te bi dodatno dovelo u pitanje zakonitost cjelokupnog postupka i povjerenje ponuđača u nepristrasnost provođenja javne nabavke.

Imajući u vidu da su na opisani način objektivno narušeni osnovni principi propisani članom 3. Zakona o javnim nabavkama, i to princip transparentnosti, jednakog tretmana, nediskriminacije i osiguranja pravedne i aktivne konkurencije, Komisija je u aktu broj: 08-01-03/2-11-2-958-12/26 od 05.05.2026. godine predložila ugovornom organu otkazivanje predmetnog postupka javne nabavke.

Nakon razmatranja cjelokupnog spisa predmeta, ugovorni organ je ocijenio da su ispunjeni zakonski uslovi iz člana 69. stav (3) Zakona o javnim nabavkama, prema kojem ugovorni organ može otkazati postupak javne nabavke zbog dokazivih razloga koji su izvan njegove kontrole i koji se nisu mogli predvidjeti u vrijeme pokretanja postupka, a koji onemogućavaju zakonito okončanje istog.

Slijedom svega navedenog, odlučeno je kao u dispozitivu ove Odluke.

PRAVNA POUKA:

Svaki privredni subjekat koji ima ili je imao interes za dodjelu ugovora o javnoj nabavci i koji učini vjerovatnim da je u konkretnom postupku javne nabavke bila ili je mogla biti prouzrokovana šteta zbog postupanja ugovornog organa, a koja se u žalbi navodi kao povreda ovog zakona i podzakonskih akata od strane ugovornog organa u postupku javne nabavke, ima pravo uložiti žalbu na postupak u pisanoj formi u roku od 10 (deset) dana od dana prijema ove Odluke. Žalba se izjavljuje Uredu za razmatranje žalbi Bosne i Hercegovine, putem ugovornog organa u pisanoj formi direktno, elektronskim putem ili preporučenom poštanskom pošiljkom. Žalba se podnosi u najmanje 3 (tri) primjerka.

DOSTAVLJENO:

Ponuđači, 1x.-

Sektor za podršku, 1x.-

Spis, 1x.-

